



徐姿華 女士

客家語 / 短篇小說類 / 教師組

得獎作品 /

加分人生

【得獎感言】

甘願事成，毋甘願萬項難。

感謝教育部閩客語文學獎評審先生个肯定；勞瀝一路里來鼓勵僱用大埔客語書寫个登志先生、玉蕉先生，好得有若等鞭策並牽成，僱正使得略略捕捉著訣，用吾手寫吾口，同阿姆教僱个話語，化做客語文寫出來，未來僱共款會看核若等个身影、跔核若等个腳跡，共下為傳承大埔客語打拚；也當勞瀝吾个屋家人，總係分僱恣恣个愛同支持，有若等做伴，路較陋扣彎幹也會變做平順好行。

文章肚，佳芬毋向命運掣頭，認真拚出自家个路，尋轉自家做主个幸福人生，在這也勉勵大自家愛堅持客家精神硬程、增志、擔輸贏，相信肯拚總會出頭天，定著使得迎來自家个加分人生。

加分人生

屋側角該頭老茄荖樹打子打去結結結，樹頂掛核一葩一葩像黃泥色細葡萄个茄荖子，錫來兩三隻白頭傑在樹頂絡食，脣頂一頭壯旺个山芙蓉，歸樹開滄滄白色帶水紅色个花蕾，磚結个圍牆下一蒲滄黃色个菊花也開來當鬧，在冷冷个寒天日頭下，共樣現出厥等熱情个生命力。

「阿貴嫂，阿貴嫂！」

「欸~~無人在係無？仰脣喊無人應？」阿水自家在該嚟呀。

「哦~~係阿水哥，來寮哦！」阿月在屋背洗衫，聽著人喊行緊出來，兩隻手還濕浴浴，嘴緊講話手緊幫褲。

「無啦！這站愛無閒出柑，等下斯過愛去剪柑咧。這幾粒柑分若等食啦！」阿水拿一袋極柑分阿月。

「唉唷，恁歪勢，總係食若果子。」阿月應。

「這哪有麼个，這兜燒抨个柑，無靚啦！還食得。若等莫棄嫌，搵食啦！」阿水牙噉噉笑緊講。

「啊！阿水嫂好食潑波籽，俚上站做个當堵好食，你拿幾坭轉去分阿水嫂食。等俚下！」阿月轉身行入灶下。

「恁煞猛，肚屎恁大咧還愛做潑波籽。哪久時會降？」阿水講。

「哈哈，做潑波籽个時，肚屎還無恁大啦！來，若食著有中意，食撇正過來拿。」阿月拿一細袋潑波籽分阿水。

莊下醜醜个人情味，斯係在相交幾粒果子、幾抓菜之間流轉，看起來無麼个，嘎係盡錫人个所在。

過加一禮拜，冬節前一日，阿水嫂來湊阿月共下去糴米接惜圓，一入門，嘎看著阿月在藤凳項擱緊，肚屎一陣一陣疾去佢毋得結煞，面青里里、大粒汗潑細粒汗、緊啟大氣，怕係愛降咧，厥三歲个俚阿衡看阿姆恁泥，驚去嗽眇，阿月緊忍疾還愛緊拐阿衡喊佢莫嗽，看著實在真衰過。

阿水嫂隨半行半走趕去尋產婆，又尋人去聯絡做事个阿貴轉來，鄰舍幾個婦人家也遽遽來搵手。幾下點鐘久過，嬰兒順利降出來，係阿貴心心念念盡想愛得个細妹，同佢安名佳芬。

佳芬係當恬靜个嬰兒，阿姆背核佢做事，跔緊擲草、背痾痾落肥、淋菜，佳芬總係目珠律律轉這看該看，若想愛睡斯恬恬睡，毋會噉噉滾吵人，兩隻肥倫肥倫个細腳掌在同衫下背晃啊晃，跔核無閒濟借个阿姆行上行落、迂迂迴。若尿墊濕撒抑係肚屎枵咧，正會咿咿嗚嗚唉兩聲，斯愛等到厥姆銜縫有閒咧，正有好同佢飼奶、換尿墊。又因致阿月奶無罇，愛買奶粉又貴參參，高不將分佳芬食米麩，佳芬也當認分，正開始毋肯食，餓兩三擺過，米麩佢也好咧，咭咭滾緊吮路去，較贏無好食。

佳芬兩歲零，阿月厥家娘對大伯屋家搬過來共下戴，正有人同阿月搵渡細人，分阿月使得出去應事做，打零工、搵賺錢。

阿奶逐日在屋家顧這兩個細孺，蠻皮个阿衡，總係跳上跌落、逐雞公撒鴨嫵，輒輒跌倒、撞著，搵去滿哪大空細瘦、烏青紫嘔；佳芬顛倒歸日乖乖在簷簷下搞人公、搞份家啦，毋使人愁。

阿奶怨嘆講：「仰脣共樣个肚屎，會降出性體差恁多个細人？」

毋過，雖然佳芬好渡、毋會儘採嚙人，阿奶還係較惜阿衡，明顯重男輕女。在飯桌頂，阿奶會先同魚肉肉較多、魚骨較少个部分夾分阿衡，雞脾定著係阿衡个，佳芬總係食魚肚、傍雞翼。

阿月看著毋盼得，細聲拐佳芬：「魚肚軟軟營養多」、「較精个人正較曉得食雞翼，雞翼盡好食。」

佳芬看阿哥大大口緊嚙雞脾，佢也當想愛食，毋過一隻雞單淨兩支雞脾，一支在阿哥嘴頂，另外一支在阿奶碗肚。佢口涎水吞啊吞，低頭划飯、恬恬同自家該支雞翼喫淨淨。

阿衡厥姑嫁來好，係街路項盡大間金店个心白，佢記得有孝阿姆，嘎看自家外家匱阿哥當無。兩三禮拜斯會轉來看厥姆一到，佢會買兜蚵乾、割一細料靚豬肉抑一屑粉腸，愛分厥姆食滋養。佢用細鑊煮蚵乾糜，抑係煮粉腸湯，燉兜靚肉四神湯，驚厥哥个細孺食，這兜私菜會恬恬送入厥姆个間房。成半下，也會買兜啫嗒、糕餅分厥姆食，厥姆見看著妹轉來斯開容笑面，兩子哀園在間肚叮叮咚咚，寮到下晝三、四點厥姑正轉屋。

等阿衡放學轉，阿奶會偷偷攞佢入去間肚，食阿奶特別留分「金孫」个點心，看阿衡食都恁滿足，阿奶也當歡喜。阿衡想留兩細坭粉腸分佳芬食，兜緊碗正行出間房門口，阿奶斯咄佢：「毋遽遽食撒，愛拿去哪？」

阿衡講：「佳芬旨有食，這兩坭分佢食。」

阿奶講：「惹孫，這係你正有个，該佳芬係細妹齋，毋使食恁好，無採人个東西！」

在簷簷下跔緊看蟻公趕來趕去搞生趣个佳芬，毋知麼个係「細妹齋」，毋過，正六歲个佳芬，也當知阿奶較惜阿哥、毋惜佢，聽著阿奶个話，細細个心肝娘也試著疾疾。

分阿奶當做金團寶个阿衡斯像毋知頭天个細人，歸日遊遊野野、弛崗打陣，成半下打爛人个窗門、偷摘人个果子，分人投到屋家來，阿貴會大聲罵阿衡、責罰佢，毋過阿奶總係替阿衡講情，偷偷放走罰企个阿衡。

佳芬讀國小三年生該年，阿貴發生車禍，下齡同正手肩頭、飯匙骨撞斷撒，圓身也當多位筋骨拉傷、歸身空口了了，愛手術同骨頭斷撒个位所撫轉去、鎖螺絲、打鋼釘，愛戴院治療。阿貴戴院愛人服侍，屋家老人家、細人也愛人照顧，阿月一人無法度分做兩身，毋知愛仰結煞正好？

鄰舍阿良嫂也係阿月盡好个姊妹伴，厥細人既經大漢咧，看著阿月蠟燭兩頭燒試著當毋盼得，斯講愛同佢搵手。

「阿月，你做你去顧若老公，愛遽遽認真醫好來、顧畀砸礮，正使得搵賺錢。若家娘同細人交分偌，三餐定著有燒燒个好食，細人愛讀書、愛寫字，偌也會搵顧緊。你毋使愁啦！」

阿月目汁濫泔，心肝肚又艱苦又感謝。

「阿良嫂，還敗勢分你恁麻煩，偌也恁無步咧啦，正經愛拜託你咧！」

「月，毋使想恁多，偌等像姊妹个樣，相幫相搵當自然，毋使恁客氣！」

阿月在醫院顧阿貴，阿良嫂逐日照起工，打早去阿月屋家煮朝、帶細人去讀書，同厥等洗衫、巡菜園，煮當晝、煮夜、看細人寫字、洗身，等細人睡撒咧，收掣正轉屋。

有一日，阿良嫂在煮菜，煮到半爛燻嘎無瓦斯咧，阿良嫂喊人送瓦斯來，瓦斯旨送

到，阿良嫂又恤著米缸也會無米咧、火油、鹽也會用撇咧，天光日愛記得去買兜轉來。

阿良嫂：「唉唷！仰結煞？米缸空空咧，火油、鹽也會無咧，天光愛去買，無斯無飯好食哩啲！還有等下瓦斯來，也愛先納錢畀。」

阿奶：「阿月有先拿兜錢搭你無？」

阿良嫂：「有啦！毋過，這兩禮拜買菜，硬硬會無咧。」

阿奶：「無恁泥，先同你借啦！等阿月轉正拿錢還你，好無？」

阿良嫂：「當然好！伯姆，錢个事情你毋使愁啦！」

佳芬在脣項寫字，大人講話佢恬恬聽，阿姆總係交代佢「細人有耳無嘴」，佳芬試著一件事當趣怪又毋敢開口問，斯將問題先囿在心肝肚。

在醫院四個零月，阿貴又加手術幾下到，因致愛清理發禍貢膿个空口，骨頭生轉去咧又愛同鋼釘、螺絲拿出來……等等，來來去去開撇當多錢，該當時還言有健保，項項都愛自家出錢，阿貴同阿月無奈何分這病疾絢在醫院，無人好賺錢，開銷又恁大，實在會逼死人咧！

阿貴：「好咧，佢想愛來去轉咧，醫院戴恁久，人硬硬都會生菇咧！」

阿月：「毋過，你還言完全好，這下轉去曾使得？」

阿貴：「毋怕啦！佢使得慢慢復健，阿姆同細人在屋家，分阿良嫂無閒恁久，當敗勢。轉去，換佢渡細人，你也使得去加減賺兜錢！」

阿月聽阿貴恁泥講試著有理，斯同意辦退院。第二日下晝厥等轉到屋家，阿衡同佳芬當久無看著阿爸阿姆，又歡喜又艱苦，搨核厥等又噉又笑。

阿月準備好等路去送阿良嫂，親身去同佢會勞瀝，在這恁艱難个時節肯搨手，還將歸屋大大細細照顧來恁好勢，實在係愛當深个交情同當大个人情，毋係簡單送等路講勞瀝斯得過个，這姊妹伴个真心，阿月仰脣都毋會毋記得。

這幾個月屋家搭阿良嫂照顧，當然好勢好勢，毋過食个、用个也開撇毋會少錢，店項先賒數个、還有阿良嫂先打出个，總愛先凝兜錢來還，阿月同阿貴在間房肚參詳愛仰脣還錢，佳芬聽著，轉去厥間肚拿出一個奶粉罐，罐肚係佢囿个砵年錢，20張紅紅个10箍錢

票，一抹煞做下拿分阿月。

佳芬：「阿姆！這錢先分你用啦！」

阿月：「唉唷！佳芬你做麼有錢？」

佳芬：「這係過年領著个紅包，佢囡2年咧！」

阿貴：「嗯！佳芬恁乖，你囡錢係想愛買麼个？」

佳芬：「無啦！佢係想愛囡分阿姆用个。」

阿月聽著當感動，這細人做麼恁曉得，佢目汁含核緊掌佳芬个頭那。

阿貴緊領頭，講：「唉！惜這妹有效啦！」

佳芬搖頭，問：「阿爸、阿姆！有一件事佢試著當趣怪呢！」

阿月：「麼个事情趣怪？」

佳芬：「做麼个屋家無錢个時節，會恁堵好無米又無油？還過無瓦斯？」

阿月同阿貴你看佢、佢看你，佳芬問著一個連大人也回答毋出个問題。

係呀！仰脣會無錢个時節，堵好缺米少鹽？仰脣會無錢个時節，堵好無瓦斯？

該當時个佳芬，毋知係因致無錢，正會無好買米買油，正會這欠該少，應該毋使細人愁慮个生活開銷，佳芬細細漢斯鼻著匱人無奈个味瑞咧！

因致阿貴在屋家使得搵顧細人，阿月斯敢應愛較早出門抑較暗下班个事頭，比論講愛打早四、五點斯去園肚剪葡萄、剪大梨，抑係輒輒愛趕事、斷烏還毋得轉夜个泥水小工這兜，雖然這兜事工時長，毋過一工人个錢也較多，做工當辛苦，毋過比起分債務逐逼个艱苦，阿月牙根齧緊，較硬斗个事也都愛做。

有人紹介阿月在寮日个時去遊樂區个溫泉飯店拚掃，愛整理間房、洗便所同洗床巾、被單，一間飯店三十外間間房，朝脣九點拚到下晝三點愛做下拚好勢，連同被單、床巾愛洗好，五點下班進前愛收好、熨好、摺好，無斯愛加班做好勢正有好轉，一工人有千五箍，阿月看著該事錢多還使得領現金，斯答應咧，無想著無恁該喺，第一日斯做去腰掛背吊、唉唉

嗶嗶，阿貴毋盼得，喊阿月莫過去咧，阿月為著錢，第二日還係早早出門去拚掃。

第二禮拜，佳芬討愛跔，佢講：「阿姆，佢毋識去過溫泉飯店，使得帶佢去看下看無？」

阿月：「好斯好，毋過佢係去做事毋係去寮，你愛乖乖莫分頭家嫌哦？」

佳芬：「好！」

去到飯店，佳芬看阿姆恁辛苦，斯遽遽搵手捋腳愛來同阿姆搵手，阿姆掃地泥佢斯清垃圾桶，阿姆洗便所佢斯鑪地泥，阿姆洗被單佢斯搵晾、搵收，有佳芬搵手，該日个事頭時間內斯做好咧。

頭家微微笑講：「阿月，若妹恁乖恁肯做，若日毋會艱苦忒久啦！」原來，頭家也有偷偷觀察這兩子哀做事呢！

阿月：「勞瀝頭家好金言，毋過細人還細，好搞忒等啦！」

頭家：「無影，若妹手腳伶俐比當多歐巴桑還較認真，來，今晡日加四百箍分你，這加額个斯係若妹个工錢啦！」

阿月：「勞瀝，恁敗勢！」

頭家：「下次禮拜，若妹係有閒正過帶來搵手啦！」

該日轉夜路項，阿姆騎核奧多拜，佳芬插核阿姆个肚屎，面貼核阿姆个背囊，夜風冷冷佳芬心肝肚當燒暖，佢歡喜自家有能力使得略略分擔阿姆个擔頭。該年，佳芬小學四年生。

因為家境困難，阿衡同佳芬無參加過小學、國中畢業旅行，寮日也無好出去寮，雖然當認真同阿姆搵手，在先生、同學面頭前，佳芬嘎無麼个自信，較毋敢表示自家个意見，愛當有把握正肯開口，連自家阿舅來屋家坐寮，佳芬會囧在間肚，等阿舅走正出來。阿衡斯較江湖，曉得變巧、反應又好，雖然讀書無半撇，毋過知上下進退，應對交際能力當好。

阿貴个身體恢復來無已好，骨頭斷撇个所在還係無法度載力，也難尋頭路，因致恁泥，阿月斯過較拚，去購田來種敏豆、種薑嫲、種辣椒。放寮日，阿衡同佳芬斯係阿月个助手，薑嫲園擲草、落肥、上土，這兜事做下毋會當難，肯學斯曉，盡得人驚个係薑嫲園

當多花囉蚊，做事一出汗該蚊斯培都培毋離，逐擺去薑嫲園做事轉夜，歸身降了了又癢又疾，衰過正得。

敏豆田也係分人想著斯切个所在，當在遞藤个敏豆，爬在一行一行豆筴竹面，該敏豆當會生蟲，間三日斯愛射一擺農藥，射藥个時節盡艱苦，長長个藥管愛拉昇順，射藥个人正會好做事，毋過難斯難在藥管毋會乖乖聽話，一轉幹、一換行斯會徑在豆筴竹下，拖毋來、拉毋去，射藥个人斯會騰火鉢焗著，大聲咄人，拉藥管个拉去艱苦咧也會火當猛，所以做敏豆事盡會打壞感情。偏偏，為著生活，阿月愛種價數好个敏豆、同好照顧个薑嫲，該阿衡同佳芬个少年時代，當多奈日斯係在同花囉蚊並豆筴竹相戰之下消蝕个。

哪知，天公伯分厥等个考驗還旨煞，阿貴因致食藥食忒多嘎著腰病，醫生講愛洗腰，這對阿月來講係過較大个打擊，等阿貴休養、復健恁久，無等著佢身體康健變砸礮，顛倒還較壞，逐禮拜愛去洗腰兩到，增加開銷以外，驚洗腰過程有毋鬆爽還過愛專人陪伴，恁泥阿月又愛撥兩日來照顧阿貴，對等緊錢用个厥等來講正經係雪上加霜。

阿衡本來斯毋好讀書，國中畢業想去水電行學師，阿月勸話佢：「有讀書正有較好个機會，毋使一生人做工、看人面色。」阿衡看著阿姆長期為這屋家日夜操勞，搥去黃皮瘦弱，如今阿爸愛去洗腰，未來生活定著過較艱苦，這流漂子一夜轉性，佢無想分阿姆為難，也想兼顧自家个興趣，斯去打夜學，日時頭學師，做事賺錢，暗晡頭正去讀書。

佳芬自細功課都毋會嫻，毋過佢毋讀普通高中去選讀商科，想講高中畢業斯使得尋頭路賺錢，減輕阿姆个負擔。

阿月：「佳芬，若分數有罅，做麼个毋去讀高中抑係五專呢？」

佳芬：「阿姆，五專註冊費較貴，高職三年快快，等佢畢業斯使得同你搵賺錢咧！」

阿月：「冤枉个細人，跔毋著爺哀，做麼个都愛比人辛苦，唉！」

佳芬：「阿姆，莫想恁多，等佢同阿哥開始賺錢，你同阿爸斯使得享福咧！」

屋家个情況，分佳芬考慮未來出路个時，無法度做過較好个選擇，在佳芬个心肝肚，使得略略分擔阿姆个辛苦，斯係厥盡大个想望。

高中畢業了後，佳芬个同學做下去會計師事務所上班抑係去公司做會計，佳芬試著

做會計一個月萬二個銀，無法度同阿媽搵手還債，心肝野野想愛尋較多錢個頭路，時間較長、較辛苦也毋怕。學校附近个砂石場堵好愛尋調度小姐，佳芬斯去應這頭路，經理看佢少歲，無社會經驗也無麼个自信，無麼敢用佢。

經理：「你正畢業，仰脣毋去尋本科个事來做，做麼个來這位應事呢？」

佳芬：「會計賺个錢少，若等公告寫配合加班會有三萬二，佢想愛賺錢，也使得加班，條件堵好佢斯來咧。」

經理：「這位个事無恁簡單哦！有時下會堵著無講理个人客抑係魯夫个司機，你敢使得？」

佳芬聽著著驚下，毋過恁著阿媽該背瘟瘟个身影，一下斯麼个都毋驚咧，佢應講：「無問題，分佢試下看，好無？」

經理看佳芬恁有膽識，笑咪咪講：「好，天光日開始上班，使得無？」

佳芬遽遽應好，想著逐個月月給比同學多兩萬箍，這兜錢使得遽兜同屋家搵還債務，心肝肚當歡喜，天光日，愛面對仰脣个人客同司機，想起來也膽膽，佢自家安慰自家：

「毋怕，毋怕，還會有麼个比少人錢較得人驚？」

正開始上班，佳芬愛一片接電話應訂單，一片寫派車單，同車掖排出來，交分司機照單去送貨，還愛同司機報路。單淨恁泥，斯有當多工夫愛學咧！佢正對學校畢業，社會經驗少，應對進退本來都無已慶，接電話愛隨認出客戶个聲，「尊重客戶」係公司个基本要求，客戶要求送貨个時間定著愛赴時赴刻，無斯會接著逐貨个電話，若畀多打兩到電話，嘴屁較歪个，斯三字經、五字經了少話踅嘴出，無留半屑情面。過較重要个係愛兼顧司機个收入，派个車掖長短會影響司機个獎金，愛盡量同逐個司機个車掖拉畀平多平多，正毋會害司機冤家、計較、領無錢，愛樣樣顧得著也係當大个考驗。

第一禮拜有業務主任來教佢，第二禮拜起斯愛自家承擔。正起勢，司機送貨个時間同路程無掌握好，長在分客戶在工地躑躑等去毋記得，有个等去膾火著，打電話來大罵，分人刻去臭頭，佳芬當擔輸贏，目汁摔摔嚟踅緊又過笑頭笑面接電話，好得司機大哥體諒佳芬係新手，毋會忒計較車掖長短多少。慢慢，佳芬熟手咧，一個人左片肩頭夾緊電話來講，雙手緊打出貨單，還使得分神畫路線圖分司機，出貨時間抓捉著當堵好，客戶對佳芬个能力當安腦，司機个車掖也控制來當素絲，逐儕獎金也毋會爭差忒多，司機大哥做下同佳芬當做自家

个妹抑老妹个樣，出車看著有好食个點心，也會買轉來分佳芬食，獎勵厥辛勞。

佳芬逐日天甫甫光斯愛去公司出早班車，輒輒暗晡頭八、九點正有好轉夜，一個月正有好歌睏兩日忒等，毋過，佳芬試著當值，因致厥工作效率高，公司業績也提升當多，入公司兩年外，厥个月給早都毋係三萬二忒等，厥同學做會計領萬二、萬三，佳芬一個月領人四萬五，這兜錢做下拿分阿姆還債，屋家打幫有佳芬這條月給相添，阿貴破病了欠个債務，正有好慢慢還兜撇。

一日放棄，在屋家同阿爸共下食晝，佳芬挾一坵爍好油光油光个三層，搵好辣椒蒜仁豆油，放落阿爸个碗肚，過挾一口炒薤菜分阿爸。

阿貴：「佳芬，你恁辛苦上班，逐日恁早出門暗暗正轉，無睡飽愛仰結煞？」

佳芬：「阿爸，後生人毋使睡恁多啦！」

阿貴：「阿爸對你當敗勢，七嫩八後生斯愛賺錢同僱還債。」

佳芬：「莫恁泥講，好得你同阿姆，無哪有這下个僱！」

阿貴：「你愛留屑錢自家園，莫多歲咧嘎無長半屑錢，分人看無。」

佳芬：「阿爸，毋使愁啦！」

阿貴：「唉哉！吾心肝妹啊！僱還見笑啦，做人阿爸無能力分你過好日，顛倒分你食恁多苦，實在真毋盼得啊！」

阿貴講緊講緊目汁斯跌出來，跌落飯碗肚，也跌落佳芬个心肝肚，佳芬喉嚨頭硬硬，遽遽頭昂昂同目汁逼倒轉去，伸手緊掌阿爸个背囊，過同佢拍拍嚟。

佳芬：「阿爸，莫想恁多，你愛同身體顧好來，下次擺僱嫁人轉妹家，正買大大圈个豬腳分你食啦！」

佳芬挑挑搨笑面，講這句頭擺細漢該滿坐在阿爸腳膝頭項，阿爸腳緊揸緊同佳芬講个話，來弄阿爸笑。

阿貴：「好得阿爸有降著這心肝妹，無，看愛仰結煞？」

佳芬笑笑緊划飯，仰脣也胚想毋著，這係盡尾一擺同阿爸共下食飯，盡尾一擺同阿爸

講笑，盡尾一擺聽阿爸喊佢「心肝妹」。

兩日後，阿貴洗腰洗好，轉到屋家睡當晝個時，恬恬過身咧！

入殮個時，看核阿貴皺紋皺紋個面容，嘴脣略略翹往上，像係在發一個甜甜個夢，阿月當安心。阿月領核兩個細人簡單隆重同阿貴辦好後事，也像係告別過去一、二十年間來去病院個生活。

阿月毋使照顧阿貴，生活改變多出當多時間來，佳芬想阿姆辛苦歸生人，這下當做退休好好歇睏，愛阿月尋朋友共下滿哪遶遶看看。正開始，阿月也有去遶寮，毋過總係心焦奈毋核，長在坐一兩點鐘久個車去到風景區，成點鐘過斯試著無嗒無敵想愛轉，幾擺過，朋友招佢，佢也毋肯去咧。

佳芬正在愁毋知愛仰脣安排阿姆「退休生活」，堵好，阿衡同交兩年個細妹朋友想愛結婚咧，阿月斯開始無閒辦阿衡個婚禮。結婚後，阿衡舖娘肚屎當增志，一年一個連續降兩個俵，阿月開始無閒渡孫，逐日同孫共下寮，煮這煮該分心白、俵同兩個孫食，屋家肚有細孬，日過來鬧熱又生趣，阿月個面項也現出久見個笑容咧。

阿月心肝肚其實還掛吊核核，該體恤阿姆賺錢辛苦、無讀著大學、用時間去換錢還債個大慧妹，雖然分公司重用，賺當成錢，屋家債務也快會還清咧，毋過，做阿姆儕總係希望細人使得過較輕鬆個生活。

阿月：「佳芬，想愛尋過別項頭路無？」

佳芬：「無啦！這頭路做來順順，做麼愛換？」

阿月：「這公司逐日都愛你恁早出門，無斯愛半夜轉，忒辛苦咧！做恁多年咧，驚若身體會搥壞撇。」

佳芬：「毋會啦！你莫好愁毋愁，愁該落雨天出日頭啦！」

阿月：「啊無，你過去讀書，空中大學也好！」

佳芬：「唉唷！愛讀斯愛讀一般大學，讀空中大學，試著無像啦！」

佳芬無想改變現下個頭路，挑挑整治佢。

阿月：「佢係愛你好，你過去讀書，佢正毋會有遺憾。」

阿月聽出佳芬無想愛，斯細細聲辯解。

佳芬嘴硬屎肱冇，無想逆阿姆个意，該年斯去考大學讀夜間部，公司也支持佢過去進修，加請一個助理來接替佳芬五點準時下班後个事，斯恁泥，四年讀撇，佳芬也拿著大學文憑咧。

該年冬下，寒流特別強，寒囉囉个暗晡頭打狗都毋出門，十點外阿衡還盲轉到屋家，阿月同心白一儕押一個細人去睡，佳芬也早早上眠床夠被，正愛睡落覺，還迷迷糊糊看阿哥搵開厥間項門，行入來坐在眠床頭，頭犁犁無講話。佳芬當愛睡，目絲絲問阿衡講：「哥，你食飽咧？仰脣恁暗轉？」阿衡無應佢，共樣頭犁犁。佳芬恁著睡目進前間房門明明自家鎖好个，阿哥仰脣得入？

一下心肝醒醒，翻身愛問阿衡，目珠一擘開，哪有麼个人？原來係發夢哦！

「鈴~~鈴鈴~~」廳下電話響咧，恬靜个暗晡頭，電話聲聽來特別大聲，驚吵著細人睡目，佳芬盲赴著鞋斯跳緊出去接電話，電話該向一個男人講佢係交通隊个巡查，佢講出阿衡个名，講阿衡分一個食酒醉个後生駛車撞著，盲送到醫院斯過身咧。佳芬个耳公浪浪滾，頭腦無法度思考，該人到底在講麼个？仰脣訂訂打電話來滅人？阿哥應該在間肚睡目咧啦！做麼儘採咒人？佳芬手擎核電話，嘴開開呆呆。

「喂？喂？家屬愛遽遽來醫院，知無？喂？有聽著無？」

燒燒个目汁流過冷冷个面頰卵，嘎親像分燒水爇著樣，疾入心肝肚，佳芬放聲大嗽，聽著電話聲正走出來个阿姆同阿嫂，共樣目汁雙流、歸身緊顫，愛仰結煞？愛仰結煞正好？

佳芬一手扶核硬硬企毋核个阿姆、一手牽緊嗽去敬氣毋出个阿嫂，三個婦人家在寒夜个醫院太平間，看核該個睡在冰冷鐵盤面个男人，男人面色白白、目珠密密，任愛佢个阿姆、佢愛个舖娘仰脣喊也毋肯過擘開目珠、過開口應一聲。

佳芬知阿姆同阿嫂無法度處理阿哥个後事，尤其係愛在警察局、醫院同殯儀館之間走從、辦手續、申請各種資料同協調喪葬事宜，定著係自家愛主意咧。佳芬歸日無啉一口水、無食一口飯，喉嚨頭總係硬硬，肚屎也毋知枵，在外背愛堅強、愛硬程，轉到屋家愛面對兩個嗽連連、軟怠怠个婦人家，同兩個毋知頭天，單淨曉抓緊阿姑衫腳緊問：「阿

姑，阿爸仰脣言轉？」「阿姑，阿爸咧？」若毋係無人好替、無人好俾憑，佳芬也當想大聲噉，同心肝肚對阿哥个毋盼得同委屈做下噉出來，仰脣天公伯會對厥等恁無公平？

阿哥喪事辦撇，還有車禍个協調委員會等核，佳芬毋知自家仰脣耐過來个。佢看核壁項阿哥个遺像，玄玄風想起阿哥愛走該暗晡，正經有去到厥間房，明明明、清清清，正經係阿哥頭犁犁坐在眠床頭，曾係阿哥毋放心該兩個細孺囉，愛喊佢搵晟持係無？

阿哥个遺像還係共樣恁派頭，目珠、嘴脣做下在笑，當像係同佳芬講：「老妹，過分阿哥拜託一擺啦！」

佳芬在心肝肚應阿哥：「阿哥，做你放心啦！佢會盡量做，毋會分你失望啦！」

阿哥無在，阿姆也變做厥責任咧，所以，愛承擔阿哥留分佢个人生功課，佳芬決定，這生人無愛結婚，正使得好好照顧阿姆同阿哥个細人。

因致愛同阿嫂共下照顧細人，佳芬个調度工作時間忒長，實在無方便，佳芬當毋盼得換頭路，因為待遇高，又係巴掌嬾生毛--做去慣慣个老手咧，毋過，想著該兩個得人惜个細孺囉，還係愛捨撇這份頭路。靠這恁多年長个錢，佳芬分自家半年个時間準備考公職，公務人員福利穩定，上下班時間固定，對細人个教育同陪伴較堵好。佳芬當硬殼，決定个事斯會拚命做畀好，目標若設定好，斯會全力達到目標。正經，認真拚半年个時間，分佳芬考著普考，分發去學校做主計，這頭路穩定單純，上班時間固定，還奈拜六禮拜，係天公伯盡好个安排。

當多人想同佳芬介紹對象，佳芬做下拒絕，有幾擺係阿姆个朋友來講，高不將斯去坐談下，過後細俵會打電話來約佳芬，佳芬也推推撇。

阿月：「佳芬啊，細妹人標準毋好忒高，莫這擇該擇，嘎擇著爛瓠杓！」

佳芬：「阿姆，佢無想愛嫁啦！」

阿月：「細妹人無嫁，會分人看輕！這下有人介紹，有機會斯愛把握，若尋著好對象，斯行看看啊！」

佳芬：「阿姆，嫁人有麼个好？」

佳芬險險對嘴律出：「你同阿爸結婚共樣恁辛苦。」好得，遽遽嚙下舌嬾忍緊，無斯會刺著阿姆。

阿月：「細妹人嫁人，有事情兩公姐好參詳，有人共下食飯也較香。」

佳芬：「阿姆，莫愁佢，等緣分到咧，斯會結婚咧啦！」

阿月：「好啦。」

佳芬知阿姆觀念較傳統，怕無法度接受佢毋結婚个決定，斯打算拖緊來，等多歲咧，自然毋使過愁愛嫁毋嫁咧。

佳芬在學校應對進退適當，上迎下請、當得人和，佢當認真，會計係厥本科，記帳、捉帳對佢來講像食糜个樣。在砂石場个經歷，愛同時應付客戶並同事，同佢畏事驚生个個性改撇，變做大方、活潑，因致砂石場愛出貨時間逼、壓力大，訓練出佳芬使得輕鬆面對壓力，從容做事情个態度。

佳芬在新个工作領域共樣輕鬆自在，穩定个工作時間，分佳芬使得安排帶阿姆、阿嫂同佢共下出去寮。細人細細斯無阿爸，好得厥姆當認真晟持，顧來當好，阿奶同阿姑也會搵教，細人身體康健又有禮貌，阿姑還會輒輒安排各類戶外活動來鍛鍊厥等个體力、培養厥等个興趣，像帶厥等打球、跋山、釣魚、露營……這兜，佳芬也會費心思先去研究這兜活動，希望在細人个成長過程毋會因致阿爸缺席嘎跔人毋著。

今年，佳芬四十五歲咧，兩個侄也讀高中、讀大學咧，阿嫂無過結婚，在附近个安親班做先生，阿嫂當知人好，感謝家娘同阿姑照顧厥等，一家人和樂。阿月因致後生時忒做，腰骨同腳膝頭無麼當梁，天時變化斯會瘦軟疾，毋過身體康健、精神也當好。阿月怕係看開咧，對幾年前起勢，斯無過催佳芬愛嫁人咧。佳芬對自家未來个規劃係愛過讀研究所，同在後生時節因致環境毋好做毋到个事情，在時間配合得著个情況之下，好好來完成。

「佳芬」，這名安來好，對佳芬个爺哀來講，佳芬出世斯為厥个家庭「加分」咧，佢同阿衡兩個鬥共下，有子有女斯變做一隻「好」字。「佳芬」，這名安來好，因致阿貴破病，背歸身債，佳芬認真打拚賺錢，改善「匱」个環境，為屋家「加分」當多。「佳芬」，這名安來好，對佳芬來講，厥个人生也係因致自家毋認輸个堅耐精神漸漸「加分」，同自家對濫泥樣个環境當中拉跔起來，順帶同歸屋家人也拉跔起來，「佳芬」也為自家个人生「加分」。